

Fronteira Marítima Timor-Leste ho Indonézia

Timor-Leste no Indonézia goza relasaun ne'ebé besik no dura no sai nu'udar modelu globál ba rekonsiliaun no parseria konstrutivu. Nu'udar nasaun viziñu sira iha rai no tasi, ne'ebé fahe fronteira ba malu iha norte, oeste no leste, nasaun rua ne'e iha obrigasaun tuir Konvensaun Nasoins Unidas kona-ba Lei Tasi nian (koñesidu ho naran UNCLOS) atu delimita sira-nia área marinã sira ne'ebé sobrepoin malu atu nune'e bele klarifika extensaun husi sira-nia soberania no direitu soberanu.

Hafoin konkluzaun ho susesu ba konsiliaun obrigatória ho Austrália tuir UNCLOS, no asinatura Tratadu 2018 entre Timor-Leste no Austrália estabesele sira-nia Fronteira Marítima iha Tasi Timor, Timor-Leste tau atensaun ba delimitasaun fronteira marítima ne'ebé sei iha ho Indonézia.

Tratadu Fronteira Marítima 2018 entre Timor-Leste no Austrália espresamente hatur katak laiha prejuizu ba negosiasaun no delimitasaun fronteira marítima entre Timor-Leste no Indonézia.



**FIXA
INFORMATIVA
FEVEREIRU 2026**

Hatene liután @ www.gftm.gov.tl
ka kontaktu:
Gabinete Fronteiras Terrestres no Marítimas
Governu Repúblika Demokrátika Timor-Leste
email: info@gftm.gov.tl | tel: +670 7742 5544



**Gabinete
Fronteiras
Terrestres
no Marítimas**

Tanba sá Fronteira Marítima importante tebes ba Timor-Leste?

Kompleta fronteira marítima permanente nu'udar prioridade nasional ba Timor-Leste. Ida-ne'e hanesan pasu ikus hodi estabelese Timor-Leste nia soberania completa no direitu soberanu nu'udar estadu independente.

Ba povu Timor-Leste, asegura nasaun nia direitu ba nia área marítima sira nu'udar kontinuasaun husi sira-nia luta naruk ba autodeterminasaun, soberania no independénsia.

Fronteira marítima ne'ebé klaru no konkorda ona fó serteza jurídica no permite Timor-Leste atu explora ho responsabilidade, jere, proteje no desenvolve nia rekursu tasi no tasi-okos, inklui enerjia no peskas. Ida-ne'e sei apoia desenvolvimentu ekonómiku sustentável, enkoraja investimentu no konfiansa negósio no hametin planeamentu nasional ba tempu naruk.

Reseita sira ne'ebé hetan husi rekursu hirak ne'e kontribui ba Timor-Leste nia fundu rikusoin soberanu, ne'ebé dedika hodi apoia ekuidade interjerasional no harii futuru ida ne'ebé prósperu, inkluzivu no sustentável ba povu Timor-Leste.

Indonézia delimita ona nia Fronteira Marítima ho nia nasaun viziñu sira seluk?

Indonézia maka Estadu arkipélajiku boot liu iha mundu, ne'ebé kompostu husi illa liu 17,000. Nasaun ne'e fahe fronteira marítima ho Estadu sanulu. Daudaun ne'e Indonézia konkorda ona ka konkorda ona parsialmente fronteira marítima ho Malázia, Austrália, Tailândia, Singapura, Índia, Papua Nova Guiné, Vietname no Filipina. Husi nasaun sira-ne'e, Timor-Leste no Palau maka úniku nasaun rua ne'ebé maka Indonézia seidak halo akordu ruma kona-ba fronteira marítima; maibé Indonézia hahú ona diskusaun ho nasaun rua ne'e.

Saida mak pontu situasaun negosiasaun Fronteira Marítima ho Indonézia?

Líder Timor-Leste no Indonézia konkorda ona iha Agostu 2015 latu hafoun no habelar diskusaun bilateral sira hodi kobre fronteira terrestre no marítima. Timor-Leste no Indonézia hahú diskusaun delimitasaun permanente ba fronteira marítima iha fulan-Setembru, tinan 2015.

Durante faze inisiu konsultasaun sira, nasaun rua ne'e hamutuk desenvolve prinsípiu orientadór, metodolojia téknika no planu servisu ida ba negosiasaun sira. Estadu rua kompromete atu negosia fronteira marítima permanente tuir lei internasionál, partikularmente UNCLOS.

Enkontru tékniku preliminar entre Timor-Leste no Indonézia hala'o ona iha tinan 2018 nia rohan iha Bali no iha inisiu tinan 2019 iha Singapura no iha Bali. Enkontru sira-ne'e estabelese baze importante ba negosiasaun sira iha futuru.

Desde tinan 2021 nia rohan, Timor-Leste no Indonézia kontinua diskusaun liuhusi kanál diplomátiku sira hodi avansa delimitasaun pasífika ba sira-nia fronteira marítima, tuir lei internasionál no iha espíritu relasaun viziñu ne'ebé besik. Esforsu sira-ne'e inklui ona interkámniu iha altu-nível no enkontru informál sira ne'ebé ho objetivu atu hetan komprensaun mútua no loke dalan ba negosiasaun formál no substantiva sira.

Diskusaun kontinuasaun sira ne'e rezulta marku importante ida ho akordu atu hahú negosiasaun formál fronteira marítima iha tinan 2024. Ronda rua negosiasaun formál hala'o ona iha 2025: iha fulan-Agostu iha Dili no iha fulan-Dezembru iha Yogyakarta. Negosiasaun formál fronteira marítima kontinua la'o hela.

Timor-Leste nia delegasaun lidera husi Sra. Elizabeth Exposto, Diretora Ezekutiva Gabinete Fronteiras Terrestres no Marítimas no Xefe Gabinete Primeiru-Ministru, tuir diresaun no lideransa husi S.E. Primeiru-Ministru Kay Rala Xanana Gusmão.

Área saida de'it mak sujeitu ba delimitasaun?

Timor-Leste iha segmentu marítimu haat ne'ebé seidak rezolve ho Indonézia, hanesan tuir-mai ne'e:

- iha kosta Súl, iha Tasi Timor, presiza halo negosiasaun ba fronteira marítima ba parte oeste no ba parte leste;
- iha Norte, enklave Oe-Cusse hamosu kestaun espesiál tanba hale'u ho Indonézia;
- iha mós seksaun rua iha tasi sira husi Batugade to'o Illa Ataúro no liuhusi Estreitu Wetar tun ba Illa Jaco ne'ebé presiza halo delimitasaun.